

**“Dile tu la tô detule”  
Premiâts i vincidôrs dal concors de ARLeF**

**Lino, stino o ce fasino? - E tasê, che al è di mode? - Alc al è alc e Hulk al è vert** a son i trê miôr mûts di dî in lenghe furlane selezionâts pal concors “Dile tu la tô detule!”, promovût de ARLeF tal Autun passât, in ocasion des manifestazions Friuli Doc e Gusti di Frontiera. La iniziative, inmaneade de Agjenzie Regjonâl pe Lenghe Furlane, e à volût racuei i guscj dal public e il mût di dî par furlan plui amât. **Tra lis centenârs di cartulinis compiladis** li dal bancut promoziônâl de ARLeF, la jurie – che il so compit al jere ancje chel di verificâ l'ûs coret de grafie uficiâl - e à **selezionât trê mûts di dî proponûts in maniere respetive di Katia Ronchi di Reclûs di Atimis, de zovine - e à dome 10 agns - Agnese Catalan, e di Iacopo Bodini, ducj i doi di Udin.**

La cerimonie di premiazion e je stade fate îr in presince dal president de ARLeF, Eros Cisilino, che al à consegnât ai trê vincidôrs la maiute personalizade propit cul sproc proponût di ognidun di lôr. Lis detulis “dal cûr” a devenaran cumò ancje il sogjet des gnovis cartulinis promoziônâls de ARLeF e a saran promovudis midiant dai canâi *social*.

*“I sprocs che o vin racuelt cun chest concors a son prezios e a costituissin une testimoniance significative de culture furlane, che la ARLeF si impegne a valorizâ – al à rimarcât il president de Agjenzie, Eros Cisilino -. O ai cetant plasê che i vincidôrs a sedin ducj zovins, e insieme a lôr o ringracii ducj chei che a àn partecipât ae iniziative”.*

*“Lino, stino o ce fasino? al è ce che o disìn dispès cuant che o sin ator fra amîs – e sclaris Katia Ronchi -. Nus plâs parcè che al è cuasi un disberdeelenghe, e nus da il ritmi just.”*

*“E tasê, che al è di mode? lu dîs simpri mê none che e je di Sedean – e conte la piçule Agnese, che e frecuente la cuinte elementâr -. Tal so paîs, une di une fantate e je lade fûr cuntun garoful pontât su la maie; un fantat i à fat i compliments ma jê no le à cjapade ben... E e à rispuindût a di chel cun chest mût di dî.”*

*“Alc al al è alc e Hulk al è vert al è ce che e ripet simpri mê mari - al à sotlineât Iacopo Bodini -, fasint ridi ducj i presints.*

Une selezion dai mûts di dî par furlan racuelts cul concors “Dile tu la tô detule!” e je ancje il teme dal calendari dal 2019 de ARLeF.

*Udin, ai 14 di Fevrâr dal 2019*

**INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<